

四庫全書

史部

欽定四庫全書

史部

唐會要卷六十七至

詳校官編修臣溫汝适

編修臣程嘉謨覆勘

總校官降調編修臣倉聖脉

校對官中書臣陸湘

謄錄監生臣王宮

欽定四庫全書

唐會要卷六十七

宋 王溥 撰

東宮官

太子太師太傅太保

隋朝秩二品皇朝因之

少師少傅少保

顯慶元年正月十九日置初無員

品選高名重德者為之遂以韓瓊來濟許敬宗兼之開

元中始編入令置四員建中四年九月二十五日又加

兩員興元元年正月二十九日又加四員貞元四年正月一日勅宜留元額四員餘並勒停

詹事府

龍朔二年改端尹府咸亨元年復為詹事府光宅元年改為宮尹府神龍元年又改為詹事府

詹事一人 貞觀元年置龍朔二年改為端尹咸亨元年復舊天授中改為宮尹神龍元年復為詹事

少詹事一人 貞觀初置龍朔二年改少尹咸亨中

復舊天授中又為少尹神龍中復故

丞二人

龍朔二年改為端尹丞咸亨中復故天授

中又改為官尹丞神龍元年復故

司直二人

顯慶元年置龍朔二年二月九日改隸

桂坊後罷桂坊却隸詹事府

貞觀十五年魏王泰移居武德殿院太子太師魏徵諫曰此殿在內處所寬閒來候往來極為近便但魏王既  
是愛子陛下常欲其安全每事抑其驕奢不處嫌疑之

地今移此殿便在東宮之西海陵昔居時人以為不可  
雖時移事異猶恐人之多言又王之本心亦不安息既  
能以寵為懼伏願成其美十七年十一月二十八日誕

皇太子太孫宴宮寮於弘教殿太宗幸東宮自殿北門  
入謂宮臣曰頃來生業稍可非乏酒食而唐突公等宴  
會朕有中館之慶故就公為樂耳謂太子曰爾國之儲  
貳府藏是同金玉綺羅不足為賜但先王典籍可鑑誠  
耳因賜尚書毛詩孝經各部太子太傅蕭瑀曰今所賜

書請陳其要上許之瑀乃先說孝經次述尚書未敘毛詩咸舉其要旨申明義趣可為深誠者皆委曲言之上大悅以為師傅得人

開成二年宰臣鄭覃兼太子太師欲于尚書省上事太子詹事馮定奏曰據太子太師隸詹事府不合于都省上乃詔於本府上事

左春坊

本門下坊龍朔中改為左春坊咸亨中復為門下坊景

雲二年八月二十五日改為左春坊

左右庶子 龍朔二年改為左右中護咸亨元年復為庶子

長安二年正月太子左庶子王方慶上言謹按典籍所載人臣與人主言及上表未可稱皇太子名者為太子皇儲其名尊重不可指斥所以不言晉尚書僕射山濤啟事稱皇太子而不言名濤中朝名士必稽典故其不稱名應有憑准朝臣尚猶如此宮臣諱則不疑今東宮殿及門名皆有觸犯臨時

諭啓迴避甚難孝敬皇帝為太子改弘教門為崇教門沛王為太子改為崇賢館為崇文館皆避名諱以尊典禮此則成例並為範模伏望天恩因循舊式付所司改從之

貞元元年七月勅左右庶子准天寶三年勅令在左右侍丞郎之下諸司四品官之上今在少卿之下非也宜改正

太和四年十一月左庶子孫革奏當司典膳等五局郎伏以青宮列局護翼元良必用鄉相子弟先擇文學端

士國朝不忘慎選用得其人或數歷清資或致位丞相  
今以年月既久漸至訛替緣其俸祿稍厚近年時有流  
外出身者僥幸授任稽諸故事未嘗聞流外得廁此官  
若不約絕實玷流品當司有司經局校書正字品秩至  
卑而文學之人趨競者蓋以必取其人無有塵雜故也  
今五局郎資序本是清品若使流外不已則此司官屬  
漸成蕪蔓伏請自今以後吏部不得更注擬流外人其  
見任官中有流外者許臣具名牒吏部至注官日注替

勅旨宜依其見任官是流外出身授者待終考秩自今  
後吏部更不得注擬

中允 武德初為內允三年三月十日改中允又隸  
門下坊永徽三年八月二十日又避皇太子諱改為內  
允中舍人改為內舍人顯慶元年太子廢復為中允龍  
朔二年改為左贊善大夫咸亨中復改為中允

司議郎 貞觀十八年十月四日皇太子上表曰臣  
聞漢書曰太子既冠成人乃有紀過之史今所以冒敢

陳聞請遵故實願付史職用為咸誠於是門下坊置司  
議郎四員正六品上掌侍奉規諫駁正啟奏并錄東宮  
記注分別坊事以敬播來濟為之馬周歎曰所恨資品  
妄高不得歷居此職不無恨焉

儀鳳四年五月皇太子賢頗邇聲色司議郎韋承慶上  
書諫曰臣聞太子者君之貳國之本也所以承宗廟之  
重繫億兆之心萬國以正四海屬望況殿下有少陽之  
位有天挺之姿片善而天下必聞小能而天下咸服豈

有不為盡善盡美之事以取可久可大之名哉伏願博覽羣書以廣其德屏退聲色以抑其情為上嗣之稱首奉聖人之洪業

左右諭德 龍朔二年置左右春坊各一人

左右贊善大夫 龍朔二年改中允為贊善大夫至咸亨元年復為中允儀鳳四年二月十一日別置左右贊善大夫各十員以授諸王之子景雲二年二月五日始兼用庶姓開元七年各省五員

貞元十六年五月以山崔芊為右贊善大夫充太子侍直新名也

司經局 龍朔二年二月九日改為桂芳罷隸左春

坊崇賢館仍置太子文學兩員司直三員咸亨中改為司經局仍依舊隸左春坊其崇賢館及司直並依舊

洗馬 龍朔元年改為司經大夫三年三月九日改

為桂坊大夫咸亨元年復舊

典設局 武德令為濟司局典設郎為太子齋郎

乾封元年皇太子久在內不出稀與官臣接見典膳丞  
邢文偉減膳上啟曰竊見禮大戴記曰太子既冠成人  
免於保傅之嚴則有司過之史虧膳之宰史之義不得  
不書過不書則死之宰之義不得不徹膳不徹則死之  
近者已來未甚延約談議不接謁見尚稀三朝之後但  
與內人獨居何由發揮聖智使濬哲文明者乎今史雖  
闕官宰當奉職忝備所司不敢逃死謹守禮經遂申減  
膳其年右史員闕宰臣進擬數人上曰邢文偉嫌我兒

不讀書不肯與肉喫此人甚正宜可為右史遂拜之

右春坊

武德初因隋舊號典書坊龍朔元年改為右春坊咸亨元年又改為典書坊景龍元年改為右春坊咸亨

舍人 龍朔中改為右司議咸亨元年復舊

家令寺

龍朔二年改為宮府寺家令為大夫咸亨元年復為家令寺

率更令

龍朔二年改為司更寺令為司更大夫咸亨元年改為率更令

僕寺

龍朔二年改為馭僕寺僕為馭僕大夫咸亨元年復舊太子千牛

龍朔二年改為左右奉裕咸亨中復舊

王府官

欽定四庫全書

▲

唐會要

八

武德令師一人景雲二年十一月十九日改為傅開元  
二年九月六日省已後復置檢年月未獲武德年令又有王

國常侍郎舍人等官開元初定令並除之寶歷三年六  
月瓊王府長史裴簡永狀請與諸王共置王府一所伏  
見諸王府本在宣平坊東西角摧毀多年因循不修至  
元和十三年七月十三日莊宅使收管其年八月二十  
五日賣與邠寧節度使高霞寓伏以在城百官皆有曹  
局惟王府察吏獨無公署每聖恩除授無處禮上胥徒

散居難於管轄遂使下吏因茲弛慢王官為衆所輕雖蒙列在官班皆為偷安散秩伏以府因王制官列府中府既不存官司虛設伏乞賜官宅一區俾諸府合而共局庶察會而同處如此則人吏可令衙集案牘可見存亡都城無廢闕之曹道路息是非之論勅旨宜賜延康坊閭令琬宅一所仍令所司檢計與量修改及逐要量約什物

二年十月勅諸衛及率府王府等司應與厨飯朝官等

自今已後每放寺觀行香及有期集宜令依廊下料各與飯一餐仍令所由與京兆府計會行香即就寺觀別有期集即於側近店舍並委京兆府據人數使取當處幕次床榻鎧金供借如行香分在兩處以上准隨中書門下一處即勒廊下所由勾當他處即京兆府使與本料與勾當造食

太和六年上以魯王永年漸長擇名儒為其府屬用戶部侍郎庾敬休兼王傅戶部郎中李踐方兼司馬太常

少卿鄭肅兼長史明年魯王為太子以鄭肅嘗侍魯王  
言論典正復令為吏部侍郎兼太子賓客東宮授經既  
而太子母妃失寵上有廢斥之意肅兼長史因召見深陳  
邦國大本君臣父子之意上改容嘉之然太子竟以得  
罪

### 致仕官

舊制年七十已上應致仕若齒力未衰亦聽釐務凡請致仕

五品已上奏聞六品

已下由尚書省錄奏

貞觀二年九月一日詔內外文武羣官年老致仕抗表去職者參朝之班宜在本品見任之上

顯慶元年正月制文武官五品以上者及病不因罪解并五品已上散官以禮停任者聽同致仕

開元五年十月十四日勅致仕官應飭令所由送至宅三品已上並聽朝朔望其年十一月勅致仕官子弟無京官者其在外者聽一人停官侍養六年五月二十四日勅曾任高品官不緣貶責為卑品官者致仕身亡

並聽同高品例 二十年正月七日制曾任五品已上  
清資官以理去職者所司具錄名奏老病不堪釐務者  
與致仕官 天寶九載三月二十三日勅如聞六品已  
下致仕官四載之後准各並停念其衰老必藉安存豈  
限其高卑而恩有差降應五品下致仕官並終其餘年  
仍永為常式

建中三年九月十二日勅致仕官所請半祿料及賜物  
等並宜從勅出日於本貫及寄住處州府支給至貞元

四年四月二十三日致仕官給半祿料其朝會及朔望朝參並依式自今已後宜准此

貞元四年四月以前左散騎常侍致仕丘為復舊官初為致仕還鄉特給祿俸之半既丁母喪蘇州疑所給請於觀察使韓滉以為授官致仕今不理務特給祿俸惠養老臣也不可以在喪為異命仍舊給之唯春秋二時羊酒之直則不給雖程式無文見稱斬衰及是為服除乃復之五年三月以太子少傅兼吏部尚書蕭昕為太

子少師右武衛上將軍鮑防為工部尚書前太子詹事  
韋建為秘書監並致仕仍給半祿及賜帛其俸料悉絕  
上念舊老特命賜其半焉致仕官給半祿料自昕等始  
也

九年八月以太子右庶子史館脩撰孔述睿為太子賓  
客賜紫金魚袋致仕述睿年未七十以疾免累表方許  
賜帛百疋衣一襲故事致仕還鄉不給公乘上寵儒者  
命給公乘遣之

長慶三年四月勅尚書左丞孔戣可守禮部尚書致仕  
仍委所在長吏歲時親自存問兼致羊酒如至都其芻  
米什器之類委河南尹量事供送務從優禮筋力未衰  
堅請休退故示優禮

大和元年四月檢校右僕射兼太子少傅楊於陵以左  
僕射致仕特恩令全給俸料上疏云臣以年力衰退陳  
乞休閒伏蒙聖恩特賜矜免授尚書左僕射致仕全給  
俸料者臣伏以朝廷致祿本為職勞衰病乞閒自宜家

食而半給之俸近古所行義誠屬於優賢事亦兼於養  
老以臣慵耄猥當料程伏惟恩施以為過幸今若入踰  
常制重啟殊恩錫端寮之厚俸為朽質之私費循躬撫  
事情所不安招損害盈臣所深懼伏乞俯迴聖眷再勑  
有司得從半祿之文斯乃殘年之幸勑批云卿早更委  
任每著聲猷累聞告老之辭勉遂懸車之請故優廩祿  
示以寵勞謙光有終雖君子之貞吉當仁不讓亦先哲  
之格言宜體至懷即斷來表明日又固讓從之其年

九月勅請致仕官近日不限品秩高卑一例致仕酌法循舊頗越典章自今以後常參官五品外官四品者然後許致仕餘停

三年四月右庶子致仕滕珣奏伏蒙天恩致仕今欲歸家鄉在浙東道途遙遠官參四品伏乞特給婺州已來牒庶使衰羸獲安光榮鄉里勑旨滕珣致仕還鄉家貧路遠宜假公乘冗其請自今後更有此比便為定例

員外官

員外官及試官等夫設官分職董事置吏得人則天下  
自理尚書猶云官不必備惟其人則員外官之設可知  
也員外及檢校試官斜封官皆神龍已後有之開元大  
革前事多已除去唯皇親戰功之外不復除授今則貶  
責者然後以員外官處之

永徽五年八月蔣孝章除尚藥局奉御員外特置仍同

正員員外官自此始也又顯慶五年五月授廖紹文檢  
校書郎員外置同員外又云員外官自此

始  
未知  
孰是也

神龍元年五月三日勅內外員外官及檢校試官宜令  
本司長官奏聞飭取資歷請止舊人分判曹事自外並  
不在判事之限其長官副貳官不在此限景龍二年長  
慶宜城定安新都咸安等公主及皇后陸氏妹鄭國夫  
人馮氏妹崇國夫人并昭容上官氏與其沛國夫人鄭  
氏尚官柴氏賀妻氏女夫弟五英兒隴西夫人趙氏樹  
朋黨咸能降墨勑斜封以授官其年十月侍中蘇瓌上  
封事曰臣聞蕭何載其清淨歌以寧一漢文垂拱無為

幾致刑措光武吏員并合務在省官此即省事清心實  
裨政要關輔菽粟非賤又成役煩數州縣先有定科官  
寮祿俸不加公廨利賤更令分給員外若妻子不贍理  
即侵漁望請省員以救時弊委巡察使及州正員有犯  
咸殿勘問伏以所在員外資次相當簡公方清幹者使  
即替授訖申聞正員懼替不敢僭違員外希遷自能勵  
勗將停員外漸得省官酸棗縣尉袁楚客奏記於中書  
令魏元忠曰官者將以理人非以亂人將以利人非以

害人今天下困窮海內衰耗伏以縣牧宰選授多不得  
人自餘寮佐鮮有稱職不務公謹專於割剥比之馬也  
必除其害牧况之羊也必去其亂羣此道尚有所關而  
更員外置員所謂助桀為虐適足以速禍也斯輩自知  
員外恐人之不畏必峻法以懼之恐財之不積必枉道  
以奪之以有限之物供無厭之用欲其不用豈可得哉  
古人有言曰十羊九牧羊既不得食人亦不得息書曰  
官不必備惟其人孔子譏管仲曰官事不攝焉得稱儉

據此正員之官猶不欲其備況正員之外更置員外此則朝廷之失君侯不正誰正之哉中書侍郎蕭至忠上疏曰臣聞官爵者公器也恩倖者私惠也只可金帛富之梁肉食之以存私也若以公器為私用則公義不行而勞人解體以私惠而妨至公則私謁門開而正言路塞昔漢館陶公主為子求郎明帝謂曰郎官上應列宿苟非其人則人受其殃賜錢十萬而已此則至公之道不虧恩私之情無替當今列位已廣冗員倍之祈求無厭

日月增數陞下降不貲之澤近戚有無涯之請賣官利已鬻  
法循私臺寺之内朱紫盈滿官秩益輕恩賞不貴才者  
莫用用者不才二事相形十中有五故人不効力而官  
匪為人欲求其理實亦難遂伏願審量材識官無虛授  
私不害公情無撓法天下幸甚兵部尚書韋嗣立上疏  
曰設官分職量事置吏官得其人天下自理古者取人  
必先採鄉曲之譽然後辟于州郡州郡有聲然後辟於五  
府才著五府然後升之天朝此則用一人所擇者甚悉

推一士所厯者甚深用得其才則理用非其才則亂理  
亂所繫焉可不深擇之哉今之取人有異此道多未甚  
試效則頓至遷擢夫趨競者人之常情僥倖者人之常  
態而今務進不辟僥倖者接踵比肩布於文武之列補  
授無限員闕不供遂至員外置官數倍正闕官署典史  
困於祇承府庫倉儲竭於資俸國家大事豈甚於此  
古者懸爵待士唯有才者得之若任以無才則有才之  
路塞賢人君子所以遁跡消名常懷歎恨也御史中丞盧

懷慎上疏曰臣聞唐虞稽古建官惟百夏商官倍亦克用入此省官之義也又云官不必備惟其人又云無曠庶官天工人其代之此為官擇人之義也臣竊見今諸司員外官委積多者數十倍近古以來未之有也官不必備此則有餘人代天工多不釐務廣有除拜無所裨益俸祿之費歲巨億萬空竭府藏而已豈致理之具哉方今倉庫空虛百姓凋弊儻災旱成災租賦減入水衡無貫朽之蓄京庾闕流衍之儲陛下將何以濟之乎員外

官中或簪裾雅望或臺閣舊人或明習憲章或諳嫻政  
要皆一時之良幹多不司案牘空尸祿俸滯其才而不  
展其用尊其位而不盡其力周稱多士漢曰得人豈其  
然與臣望請員外官中有才能器識衆共聞知堪為州  
牧縣宰以上者並請選擧使宣力四方申其智効若有  
老病及不堪釐務者咸從省廢使賢不肖較然殊貴此  
當今之切務也安可謂之難哉左臺殿中侍御史崔蒞  
太子中允薛紹諷上疏曰先朝所授斜封官恩命已布

而姚元之宋璟等沮先帝之明歸怨陛下道路謗讟天下稱冤奈何與萬人為仇敵恐致非意之變上以為然乃下詔曰諸緣斜封別勅授官先令停任宜並量材敘用姚元之宋璟並先奏各賜物一百段監察御史柳澤諫曰竊見神龍以來羣邪作弊法網不提綱維大紊實由內寵專命外嬖擅權因貴憑寵賣官鬻爵朱紫之榮出於僕妾之口賞罰之用乖於章程之典妃主之門有同商賈選舉之署實均闖闖資販之子悉由邪而謬官

黜斥之人咸因姦而冒進天下愈亂而社稷幾危賴陛下聰明神武拯之將墜此陛下耳目之所親擊故可永為鑒誠豈不為寵愛謬誤親習請謁之所以致也又如斜封授官皆是僕妾汲引迷謬先帝昧自前朝豈是孝和情之所憐心之所愛陛下初即位之時納姚元之宋璟之計所以咸令黜退頃日以來又令收之將為斜封之人不忍棄也以為先帝之意不可違也若斜封之人不忍棄也是韋月將燕欽融之流亦不可褒贈也李多祚

鄭克義之徒亦不可清雪也陛下何獨不能忍於彼使善惡不定反覆相攻是陛下政令不一也又斜封之官不求殊澤得免罪戾已沐恩私旬月之中頻繁降旨前教令至冬處分後又令替人却停奈何道丈以為非勸人以為僻將何以懲風俗將何以正姦邪今海內咸稱太平公主令西僧惠範曲引此輩將有誤於陛下故語曰姚宋為相邪不如正太平用事正不如邪陛下豈不懲覆車之誡而欲遵覆車之軌惟陛下熟思之

開元元年五月三日勅諸色員外試檢校官除皇親及  
諸親五品以上并戰陣要籍內侍省已外一切總停至  
冬放選量狀跡書判正員官今以後戰功以外非別勅  
不得輒注擬員外官

十九年正月十九日京兆尹裴迪先奏曰神州務劇官  
僚尤多更置員外試官於事頗為繁冗京縣近有此色  
天恩已令即停猶恐選曹更有注擬望請當府及京畿  
等縣自今以後一切不置員外試官

二十二年二月十六日勅應員外官所司注擬上州不得過四人中州三人下州及上縣各二人中縣下縣各一人

天寶六年六月二十四日御史中丞蕭諒奏近緣有勞人等兼授員外官多分判曹務頗多煩擾前件官伏望一切不許知事如正員官總關其長官簡清幹者權判並本官到日停勅旨依奏

五載正月二十二日勅內外六品已下員外官至考滿

日一切並停各依選例自今已後更不得注擬其皇親  
幼小及諸色承恩授官軍功伎術內侍者左右龍武軍  
並諸蕃官等不在此例

乾元二年九月二十三日詔州縣員外並任其所適計  
考滿後各與成資仍於本色內減一兩選與留如員外  
官中有材識幹濟曾經任使州縣所資者亦量留每上  
州不得過五人中州不得過四人上縣不得過三人中  
縣已下不得過一人

貞元四年正月一日勅自今已後額內官如有闕中書門下及吏部更不須注擬見任者三考後勒

試及斜濫官

天授二年二月十五日十道使舉人石艾縣令王山輝等六十一人並授拾遺補闕懷州錄事叅軍霍獻可等二十四人並授侍御史并州錄事叅軍徐昕等二十四人授著作郎內黃縣尉崔宣道等二十三人授衛佐校書蓋天后收人望也故當時諺曰補闕連車載拾遺平

斗量杞推侍御史腕脫校書郎試官自此始也

其年十二月懷州獲嘉縣主簿劉知幾上疏曰昔有唐  
御歷列職命官國多利印之譏人有積薪之歎自陛下  
臨朝頓革此風然矯枉過正亦為已甚矣至如六品已  
下職事清官遂乃方之土芥比之沙礫其有行無聞於  
十室即廁朝流識不及于三隅俄登仕伍斯固比肩咸  
是舉目皆然罕聞翹楚之歌唯見伐檀之刺戶祿謬官  
其流非一若遂不加沙汰臣恐有穢皇風

神龍元年四月一日太白山人鄭普思以方術除秘書監左拾遺李邕上疏諫曰蓋聞人有感一餐之惠殞七尺之軀況臣為陛下官受陛下祿豈得目有所見口不言之陛下親政日近復在九重所以未聞在外羣下竊議道路藉藉皆云普思多行詭惑妄說妖祥唯陛下不知尚見驅使此道若行必撓亂朝政孔子云詩三百一言以蔽之曰思無邪陛下若以普思有奇術可致長生久視之道則爽鳩氏久應得之永有天下非陛下今日

可得而求若以普思可致佛法則漢明梁武久應得之永  
有天下亦非陛下今日可得而求若以普思即致鬼道  
墨翟干寶各獻於至尊而二王得之永有天下亦非陛下  
今日可得而求此皆是涉虛妄歷代無効臣愚不願  
陛下復行之明時唯堯舜二帝自古稱聖臣觀所行固  
在人事敦睦九族平章百姓不聞以鬼神之道聰理天  
下伏願陛下察之則天下幸甚

其年六月又除方術人蔡靜能為國子祭酒侍中桓彥

範上疏曰陛下自龍飛寶位遽下制云軍國政化皆依貞觀故事昔貞觀中嘗以魏徵虞世南顏師古為秘書監孔穎達為國子祭酒至於普思等是方伎庸流豈足比蹤前列臣恐物議陛下官不擇人濫以天秩加於私愛惟陛下少加慎擇左衛騎曹叅軍宋務光上疏曰夫爵賞者君之重柄傳曰惟名與器不可以假人自頃官賞頗示乖謬大勲未滿於人聽高秩已越於朝倫貪天之功以為己力秘書監鄭普思國子祭酒蔡靜能或挾

小道以登朱紫或因淺術以取銀黃既虧國經寔悖天  
道書曰制理於未亂保邦於未危此誠理亂安危之秋  
也伏願欽祖宗之丕烈暢王業之艱難遠佞人親有德  
乳保之母妃主之家以時接見無令媒瀆酸棗縣尉袁  
楚客奏記於中書令魏元忠曰以正道事君者將以安  
天下也以非道事君者所以危天下也君有危天下之  
臣不可不逐之今國子祭酒蔡靜能及秘書監鄭普思  
等不脩忠正以事君妄引鬼神而惑主然鬼神之事冥

冥難知故左道之人因此自致其詐上惑清聽必據非  
才之位必食非德之祿此國蠹也傳曰國之將興聽於  
人將亡聽於神非細故也此朝廷之失君侯不正誰正  
之哉

太和七年七月勅入蕃使不得與私覲正員官告量別  
支給以充私覲舊例使絕域者許賈正員官告取賈自  
以備私覲雖優假遠使殊非法典故

革之

十二年六月詔以淮西河北用兵募人入粟受官及減

選超資

十五年二月勅其入回鶻使宜仍舊與私覲正員官十三員入吐蕃使與八員

伎術官

故事伎術官皆本司定送吏部附申謂秘書殿中太常左春坊太僕等伎術之官唯得本司選轉不得外敘若本司無缺聽授散官有缺先授若再經考滿者聽外敘神功元年十月三日謂自今已後本色出身解天文者

進官不得過太史令音樂者不得過太樂鼓吹署令醫術者不得過尚藥奉御陰陽卜筮者不得過太卜令解造食者不得過司膳署令有從勲官品子流外國官參佐親品等出身者自今已後不得任京清要著望等官若累階應至三品者不須階進每一階酬勲兩轉

垂拱三年十二月二十五日勅三輔及四大都督并衝要當路及四萬戶已上州市令并長安等六縣錄事並宜省補充

開元七年八月十五日勅出身非伎術而以能任伎術  
官者聽量與員外官其選敍考勞不須拘伎術例天寶  
十三年五月吏部奏准格伎術官各於當色本局署員  
外置不得同正員之數從之

太和五年七月勅諸色藝能授官今後如有罪犯停職  
者委本日牒報吏部不在敍用限

留守

貞觀十七年太宗親征遼東令太子太傅房玄齡充京

城留守詔曰公當蕭何之任朕無西顧之憂矣軍戎器械戰士糧廩並委卿處分發遣東都留守以蕭瑀為之咸亨二年正月七日高宗幸洛陽以雍州長史李晦為西京留守猶謂曰關中之事一以付卿但委用武人不可以成官政令式之外有利於人者隨即行不須聞奏儀鳳元年十一月四日司農卿韋弘機為東都留守時有道士朱欽遂為中官所使至都所為橫恣弘機執而囚之奏曰道士假稱中官驅使依倚形勢臣恐虧損皇

明為禍患之漸高宗特發中官賜書慰諭仍曰不須漏洩

垂拱三年文昌右丞相蘓良嗣為京留守時尚方監裴匪躬檢校京苑當春時將鬻苑中果菜以收其利良嗣駁之曰昔公儀相魯猶能拔葵去織未聞萬乘之主鬻其果菜以與下人爭利也

神龍二年三月侍中蘇瓌充西京留守時秘書監鄭普思謀為妖逆雍岐二州妖黨大發瓌收普思繫獄考訊

之普思妻第五氏以鬼道為韋庶人所寵居止禁中由是中宗將慰諭令璫釋普思之罪璫上言普思幻惑罪當不赦尚書左僕射魏元忠奏曰璫長者其忠懇如此願陛下察之遂配流普思於嶺外

開元十一年正月二十八日勅太原尹為留守少尹為留守七月五日勅三都留守兩京每月一日起居北都每季一起居並遣使行幸未有處其三都留守三日一起居暫出行幸發處留守亦准此遞表

元和三年五月勅承前東都留守無防禦使名往因權  
宜遂有制置俾從省使以復舊章其東都畿汝州都防  
禦使及副使宜停所管將士六千七百三十八人數內  
見所管將士都防鎮及營苑中營田河陰陽翟偃師等  
縣鎮遏使共四千六百三十人委留守收管襄城葉縣  
鎮遏使共二千一百人委汝州防禦使收管其年七月  
復置東都留守防禦兵士七百人九年十月勅東都留  
守創立新軍所召將士切資精進要得府縣共詳簿書

况分正副留守都惟舊典宜令河南尹裴次元以本官充東都副留守其月以尚書左丞呂元膺為檢校工部尚書充東都留守舊例留守必賜旗甲與方鎮畧同及元膺受任竟無所賜朝論以東有寇虞特用元膺尤不當削其儀以沮威望諫官上疏援華汝壽三州例賜戎械居守之重固宜寵借上曰此數處並不當與其後遂皆停十年十二月東都防禦使呂元膺請募山河子弟以衛宮城東都西南聯鄧虢山谷曠遠多麋鹿猛獸人

習射獵不務耕稼春夏以其族黨遷徙無常俗呼為山棚前留守權德輿知其可靡而用將請之會詔徵故元膺繼請焉

長慶二年七月以前義成軍節度使陳楚為東都留守判尚書省事東畿汝州防禦使故事東都留守牛僧孺徵拜左僕射上令左軍副使王元直賚告身宣賜舊例留守入朝無中使賜詔例上特寵異之

京兆尹

義慶元年五月十五日改隋京兆郡為雍州以別駕領  
州事以韋讓為之

貞觀二十三年七月三日改別駕為長史領州事以高  
履行為之

開元元年十二月三日改為京兆府稱西京長史以張  
暉為之

少尹 武德元年改隋京兆郡丞為治中以襄邑王  
神符為之

貞觀二十三年改為司馬以劉翁孺為之開元元年改  
為少尹以韋維為之本一員大足元年七月二十日加  
一員分左右司馬舊為左新為右以楊弘胄為之元年  
建寅月勅京尹府縣官多避諸司奏請避難就易殊非  
奉公自今後諸使諸司諸州改官充判官支使使身軀  
使等准舊勅不得放去

廣德三年三月十一日勅中書門下及兩省五品已上  
諸王駙馬哥周已上親及女婿不得任京兆府判司畿

令赤縣丞薄尉

長慶三年閏十月中書門下奏伏以所立限防止緣權要今一概防閑事誠太過

後諸應宰臣左右僕射御史大夫中丞給事舍人左右丞諸司尚書侍郎度支與鹽鐵使在城者并諸王

駙馬暮周已上親并女婿外甥請准前後勅不得在京北府判司畿縣令赤縣簿尉其餘官不在此限乏例

大歷二年李勉為京兆尹宦官魚朝恩為觀軍容使仍

知國子監事前尹黎幹求媚於朝恩每候其將至監則

盛設供具酒饌豐潔為百人之餼傾府之吏以辦之及

勉蒞職旬月朝恩入監府吏莫至先置者請於勉勉曰

軍容使判國子監事勉候於太學軍容固宜具主禮勉

官忝京兆尹軍容儻恩顧至府豈敢不飭蔬饌乎朝恩  
深銜之自是不復至太學

貞元十四年夏旱穀貴人多流亡京兆尹韓臯以政事  
不理黜之上召右金吾衛大將軍吳湊面授京兆尹即  
日令視事經宿方下制逾月湊論奏掌內廄廣騎飛龍  
內園芙蓉園及禁軍諸司等使雜供手力資課太多量  
宜減省從之

元和四年九月許孟容為京兆尹有左神策軍吏李昱

假長安富人錢八千貫三歲不償孟容遣吏收捕械繫  
剋日命還之且曰不及期當死自興元以後因禁軍有  
功軍士益橫府縣不能制孟容剛正不懼以法繩之一  
軍盡驚寃訴於上立命中使宣旨令送本軍孟容繫之  
不遣中使再至乃執奏云臣誠知不奉詔當誅然臣職  
司輦轂合為陛下彈抑豪強錢未盡輸昱不可得上嘉  
其意乃許之自此權右歛跡

十三年正月京兆少尹知府事崔元略奏諸司諸軍諸

使追府縣人吏所由及百姓等比來府縣除賊盜外所有推勘公事相關者皆行公牒近日多不行文牒不有擒捉禁繫之後府縣方知其中人吏所由亦有姦猾為無憑據妄生推住又難辨明其百姓等所被追捕緣無公牒多加恐動致有逃匿今後望降勅旨應請諸軍諸使要追府縣人吏百姓等非盜賊外並令行移文牒所冀官曹免相侵擾從之

長慶元年七月勅節文京兆府百姓屬諸軍諸使者宜

令其按名一戶之內除已屬諸軍諸使其餘父兄子弟據令式年幾合入色役者明立簿籍同百姓例差遣

三年四月勅京兆尹兼御史大夫韓愈特放臺叅以後不得為例時議以為憲司之臨府縣著自甲令苟害於理自當革之暫使一人不得為例深非立制垂久之道也

開成二年崔珙為京兆尹京畿旱奏澇水入內者十分請減九分賜貧民溉田從之

三年正月盜發親仁里欲殺宰相李石其賊出於禁中  
珙捕之不獲坐奪俸

會昌三年五月京兆府奏兩坊市間行不事家業京兆刺  
身上屠宰猪狗酗酒鬪打及僦賣關節下脫錢物擣蒲  
賭錢人等伏乞今後如有犯者許臣追捉若是百姓當  
時處置如屬諸軍諸使禁司奏聞從之

大中三年九月中書門下奏京兆府判司及兩縣簿尉  
帶諸司職事伏以列官分職各有司存苟或侵踰則乖

彙憲近日判府司及兩縣簿尉多繫諸司職掌遂使額外假稱一人兼判數曹易為因循難以責辦臣等商量自今已後諸司職掌改集賢館弘文館並不得帶府判司及兩縣簿尉集賢館弘文館仍每司不得過一員見在諸司充職者請勒歸本司勅旨依奏

唐會要卷六十七

欽定四庫全書

唐會要卷六十八

宋 王溥 撰

河南尹

武德四年平王世充廢東都置總管府以淮陽王道玄為之其年十一月十一日置洛州大行臺改為東都六年九月二十六日改東都為洛州九年六月十三日廢行臺置都督府以屈突通為之貞觀十一年三月十日

改為洛陽宮十七年五月十三日廢都督府復為洛陽  
以裴懷節為長史

顯慶三年六月五日勅洛陽州及河南洛陽二縣官同  
京官以段寶玄為長史其年十二月十三日勅宜改洛  
陽州宮為東都州縣官員階品並准雍州光宅元年九  
月五日改為神都至神龍元年二月五日復為東都開  
元元年十二月一日改為河南府以李傑為尹天寶元  
年二月二十日改為東京上元元年九月二十日停東

京之號元年建卯月改為中都

少尹 自顯慶二年置司馬以許力士為之大足元年  
加一員分為左右司馬申光為左以孟詵為右開元元  
年改為少尹以劉岑為之

開成五年四月東都奏河南尹高銖與知臺御史盧罕  
街衢相逢高銖乘肩輿無所避二人各引所見臺府喧  
競上乃詔曰尹正官重臺憲地高道路相逢儀制不定  
各執詞理每有紛爭勝負取決於一時參詳未申於久

制委有司斟酌典故聞奏都省議臺府相避比無明文  
令按前後例知雜御史與京兆尹相逢京尹迴避今東  
都知臺御史即一員兼得行中丞公事若不少加嚴重  
即恐人不稟承令據東臺所由狀從前河南尹皆迴避  
請依上都知雜御史例為制其上都御史人數稍衆若  
令京兆尹悉皆迴避事恐難行請自今已後京兆尹若  
逢御史即下路駐馬其隨從人亦皆留止待御史過任  
前進其東都知臺御史亦請准此為例其京兆尹若趨

朝及遇宣朝不可留滯即任分路前進制可

太原尹

武德元年五月二十六日并陝西道置總管府以竇靜為長史七年二月十七日改為大都督府以李弘節為之龍朔二年二月又加大字長壽元年九月置北都改為太原府都督為長史以崔神慶為之神龍元年二月罷為大都督府以宋璟為之開元十一年正月置北都以韋湊為尹天寶元年正月改為北京上元二年九月

停北京之號尋却復為北京

少尹 自開元已前為司馬與諸府同開元十一年正月改為少尹以游子騫為之

成都尹

武德三年四月九日置益州行臺以魏王泰為之九年六月十三日廢置大都督府以竇軌為之貞觀二年二月二十日去大字龍朔二年十二月六日又為大都督以丘行恭為之麟德二年十二月改為成都府稱南京

以裴冕為尹上元元年九月去南京之號

鳳翔府尹

武德元年六月十九日改隋扶風郡為岐州天寶元年正月改為扶風郡刺史為太守至德元年七月改為鳳翔郡二年十二月改為鳳翔府稱西京李曄為尹元年建卯月改為西都上元二年九月停西都之號

興德府尹

垂拱元年十月七日改為太州華陰縣為仙掌縣神龍

元年二月邵為華州四月又改為太州唐隆元年七月  
邵復為華州元年建子月肅宗不豫術士復請改為太  
州華陰縣為太陰縣寶應二年皆復舊名光化元年六  
月升為興德府刺史為尹以韓建為之左右為少尹

河中府尹

武德二年置總管府以襄陵王深為之七年改為都督  
府以楊福為之九年七月廢都督府景雲二年六月又  
置都督府以崔元琮為之十一月廢開元九年正月改

為河中府號中都以姜師度為尹六月三日停中都却  
為州乾元三年二月二十三日改為河中府以蕭華為  
尹元年建卯月一日號為中都元和三年三月復為河

中府

開元元年五月揚州功曹叅軍龐正殿學士韓覃上疏  
曰臣聞禮記月令曰孟夏之月無起土功無聚大衆昔  
魯夏城中丘春秋書之垂為後誠令建國都乃長久之  
大業也祀天地之大義襲春秋之所書奪人盛農之時

愚臣竊以為甚不可也至若兩都舊制分官衆多費耗用度尚以為損豈可更建中都乎夫河東者國之股肱郡也勁銳強兵盡出於是其地隘狹今又置都使十萬之戶將安投乎一旦陁東都而幸西都又造中都樂一君之欲遺萬人之患務在郡國之多不恤危亡之變悅在遊幸之麗不顧兆庶之困非所以建根蒂不拔之長策矣昔漢帝感鍾離之言息事德陽之殿趙主採續咸之諫止造鄴都之宮臣愚誠願下明詔罷中都則福履

無疆矣天下幸甚六月三日詔其中都宜停依舊為府

江陵尹

武德四年平蕭銑始置大總管以趙郡王孝恭為之七年二月十八日改為大都督府以濮陽王瓌為之貞觀年三月二十日去大字龍朔二年十二月十八日又改為大都督府以獨孤雲卿為之上元元年九月七日改為江陵府稱南都以呂謹為尹

興元府尹

武德元年六月十九日置總管府以李安遠為之七年二月改為都督府以韓文通為之貞觀十七年六月廢永徽七年正月置都督府以梁王忠為之興元元年六月改為興元府以嚴震為尹

都督府

武德七年二月十二日改大總管府為大都督府管十州已上為上都督府不滿十州只為都督府至開元元年著令戶滿二萬已上為中都督府不滿二萬為下都

督府

景雲二年六月二十八日制於天下分置都府二十四  
令都督紀察所管州刺史已下官人善惡

汴州 管宋蔡曹滑許陳潁等七州

齊州 管青淄濟濮登萊等六州

兗州 管徐毫沂密海泗鄆等七州

魏州 管衛相洛德貝博豫等七州

冀州 管恒邢趙定滄瀛鄭易等八州

并州 管澤潞汾儀嵐忻代朔蔚等九州

蒲州 管晉絳慈隰沁等五州

廊州 管坊延綏丹銀等五州

涇州 管隴寧慶鹽原會等六州

秦州 管成武河渭岷蘭洮扶文宕寧等十一州

益州 管彭蜀漢簡眉邛嘉雅陵等九州

綿州 管梓隆始果龍等五州

遂州 管資榮普渝合等五州

荊州 管陝郢澧朗岳鄂等六州

夔州 管忠萬歸涪黔施等六州

通州 管開渠巴蓬壁等五州

梁州 管利興鳳洋集等五州

襄州 管鄧金商均唐房等六州

揚州 管舒和滁廬楚壽等六州

安州 管沔復隨黃申蘄光等七州

潤州 管蘇常宣歙湖等五州

越州 管杭婺衢溫處台等六州

洪州 管袁吉虔撫饒江等六州

潭州 管柳衡道永邵連等六州

其揚益并荆為大都督府長史正三品其雍洛州長史亦加至從三品汴兗魏冀蒲綿秦洪潤越為中都督府正三品齊鄆涇襄安潭遂通梁夔為下都督府從三品改錄事叅軍為司舉從事合糾察管內官人每府置兩員並同京官資望比侍御史若糾不以實姦不能禁者

令左右御史臺彈奏畿內州並不隸入都督府其年七月詔置都督議者以謂權重難制所授多非精選請罷之詔令九品已上議其事侍御史宋務光議曰漢氏懲周之弊矯秦之失初置刺史十三州任用得賢海內稱理國家下明詔發德音憫黎元脩古法而拘文牽俗之黨喧然以為非期破其議或云權歸於下或以授非其人遂令方牧拜而未行朝典疑而將寢不其惜歟且授非其才或可詳擇權歸於下未之前聞且率計天下三

百餘州矣今補二十四都督物議以為未允則良二千石安得三百餘人矣苟不賢則百姓怨而和氣傷比者雨旱不調未必不由此可建之理一也巡察使人數年一出馳軒按俗往復如飛夫隱慝潛過朋戚不能知矣况使者車不停軌而能郡縣攘訟遏獄乎議者舉接多不周悉使車朝返姦吏夕生而訟者亦不全其軀命矣都督則不然久於其職無得苟且歲時巡按物無竄情行者無遠詣之勞貪者有終身之懼方伯以委之御史

以按之至愚之人猶知自勉况朝廷妙選乎可建之理  
二也秦人以役夫流賊豈監郡之過耶漢室以外氏專  
寵豈刺舉之罪耶古有明徵事無深惑可建之理三也  
今長史貪冒百姓流亡職所以安之者衆矣而多未安  
近時要一興古制此又持疑欲以蒼生何可望也所願  
率而行之以俟成績太子右庶子李景伯中書舍人盧  
補等議曰牧伯之命非古也洎秦罷侯置守方制萬里  
以綏兆人令出王廷威行郡國至漢初置刺史秩六百

石掌察墨綬已下其黃綬已上則不察焉所以全長史之威行不擾之政至漢武帝時改置州牧秩二千石遂以秩高自守而功業不著於是罷州牧又置刺史及東漢時復置州牧王綱不振寢以凌夷則事之汙隆詳於典策今天下諸州分隸都督掾糾舉之柄典刑賞之科若委非其人授受有失權柄既重疵釁或生豈所以強幹弱枝經邦軌物者也其所置都督事恐不便今巡察御史秩卑任重則漢代刺史之流也委以時巡姦宄自

禁伏願慎考古道率由舊章法乾元之簡易守前王之  
令典俾夫化洽昇平務依貞觀制度矣吏部員外郎崔  
漪議曰為政之道尚簡也理人之道尚寬也寬則得衆  
簡即易行扇之以淳風施之以惠化務崇清淨之教不  
貴滋章之法且賢良者在君用與不用邦國者在君理  
與不理豈宜察察而勞司舉孜孜而用督責者哉老子  
曰理大國者若烹小鮮誠哉是言其可不信往者周武  
之有天下封建子弟以為藩翰當其初也親以同憂有

磐石之固及其末也疎而相討成逆命之國強侵弱衆  
暴寡或諸侯犯境或天子蒙塵王室凌夷終於傾覆者  
實由枝繁必折尾大不掉之所致也前漢時吳楚大族  
山東諸豪並令遷徙長安充奉陵邑蓋以虛外實內強  
幹弱枝之計也則天分割雍州為四益州為三所以減  
削其權不使專統蓋以防微慮遠杜邪塞姦之策也何  
則惟名與器不可以假人寧容倒持太阿而授其柄始  
雖委任得人政頗有方後恐未必皆賢弊從此起矣貞

觀故事足可依行棄而不遵臣所未取

刺史上

武德元年六月十九日改郡為州置刺史別駕治中各一人天寶元年正月二十日改州為郡改刺史為太守至德二年十二月十五日又改郡為州太守為刺史

貞觀三年上謂侍臣曰朕每夜恒思百姓閑事或至夜半不寐唯思都督刺史堪養百姓所以前代帝王稱共理者唯良二千石耳雖文武百僚各有所司然理人之

本莫如刺史最重也朕故屏風上錄其姓名坐卧恒看  
在官如有善惡事跡具列於名下擬憑黜陟縣令甚是  
親人要職昔孔宣父以大聖之德尚為中都宰至於升  
堂弟子七十二人惟有言偃子路宓子賤始得相繼為  
此官乃詔內外五品已上各舉堪為縣令十一年八月  
侍御史馬周上疏曰理天下者以人為本欲令百姓安  
樂惟在刺史縣令今縣令既不能皆賢若每州得良刺  
史則境內蘊息天下刺史患稱聖意則陛下可端拱巖

廊之上百姓不慮不安自古郡守縣令皆妙選賢德欲有擢升寧相必先試以臨人或有從二千石入為丞相及司徒太尉者今朝廷獨重內官刺史縣令遂輕其選刺史多是武夫勲人或京官不稱職方始外出邊遠之處用人更輕所以百姓未安殆由於此太宗因謂侍臣曰刺史朕當自簡縣令詔京官五品已上各舉一人

垂拱元年秘書省正字陳子昂上疏曰臣竊惟刺史縣令之職實陛下政教之首也得其人則百姓家見而戶

聞不得其人但委棄有司而挂璧耳陛下欲使家傳禮讓吏勗清勤不重遷刺史縣令將何道以致之也臣比草茅為百姓久矣刺史縣令之化臣謂國家興衰莫不在此職也何者一州得賢明刺史以至公循良為政者則十萬家賴其福若得貪暴刺史以循私苛虐為政者則十萬家受其禍一州禍福猶且如是况天下之衆豈得勝道哉故臣以為陛下政化之首國家興衰在此職也伏願深思妙選以救此弊

天授二年獲嘉縣主薄劉知幾上疏曰臣聞漢宣帝云  
與我共理天下其良二千石乎二千石者今之刺史也  
移風易俗其寄不輕求瘼字人僉屬斯在然則厯觀兩  
漢已降迄乎魏晉之年方伯岳牧臨州按郡或十年不  
易或一紀仍留莫不盡其化下之方責以理人之術既  
而日就月將風加草靡故能化行千里恩漸百城今之  
牧伯有異於是倏來忽往蓬轉萍流近則累月仍遷遠  
則踰年必徙將聽事為逆旅以下車為傳舍或云來歲

入朝必應改職或道今茲會計必是移藩既懷苟且之謀何假循良之績用使百城千邑無間廉杜之歌萬國九州罕見趙張之政臣望自今已後刺史非三歲已上不可遷官仍以明察功過精甄賞罰冀弘共理之風以贊垂衣之化

長安四年三月則天與宰相議及州縣官納言李嶠等奏曰安人之方須擇刺史竊見朝廷物議莫不重內官輕外職每除牧伯皆再三披訴比來所遣外任多是貶

累之人風俗不澄實由於此今望於臺閣寺監妙簡賢良分典大州共康庶績臣等請輟近侍率先具察則天曰誰為此行鳳閣侍郎韋嗣立先對曰叅知機務非臣所堪承乏外臺庶當盡節儻得垂採錄臣願此行於是  
以本官兼汴州刺史

神龍元年正月舉人趙冬曦上疏曰臣聞古之擇牧宰者皆出於臺郎御史以為榮遷何者以為親人之職人命所繫故貴其位而重其人也今則不然京職之不稱

者乃左為外任大邑之負累者乃降為小邑近官之不能者乃遷為遠官夫常人之心未可卒革此之不稱彼焉能理率土之濱莫非王臣何必貴大邑而賤小邑重近人而棄遠人耶夫食君之祿而冒君之榮陛下賜之死可矣流之邊可矣於左遷貶降之例惡足為王者之政與夫如是則上下相同而官得其實而天下理矣

景龍二年兵部尚書韋嗣立上疏曰刺史縣令理人之首近年已來不存簡擇京官有犯罪聲望下者方遣牧

州吏部選人暮年無手筆者方擬縣令此風久扇上下  
同知將此理人何以致化今歲非豐稔戶日流亡國用  
空虛租調減削陛下不以此留念將以理國乎臣望下  
明制且論前事使有司改換簡擇天下刺史縣令皆取  
才能有稱望者充自今已後應有遷除諸曹侍郎兩省  
臺及五品已上清資望官遷於刺史內取刺史無人然  
後餘官中求其御史員外郎等諸清要六品已上官先  
於縣令中取制中明言如是則人爭就刺史縣令矣得

刺史縣令天下大理萬姓欣然豈非太平樂事哉

其年御史中丞盧懷慎上疏曰臣竊見比來州牧上佐等在任多者一二年少者三五月遂即遷改不論課最爭求冒進不顧廉恥亦何暇為陛下宣風布化求瘼恤人哉戶口所以流散倉庫所以空虛百姓凋弊日更滋甚職為此也昔漢宣帝時黃霸增秩賜金而不遷於潁川可謂美政也臣請望諸州都督刺史上佐等在任未經四考已上不許遷除察其課効尤異者或錫以車裘

或就加祿秩或降使臨問并璽書慰勉若公卿有缺則擢以勸能其政績無聞及犯貪者放歸田里則萬方之人一變於道致此之美革彼之弊易於反掌陛下何惜而不行之哉其年十月十六日勅內外之職出入須均更遞往來始成政理京官中有才幹堪理人者量與外官外官中有清慎著稱者量與京職至開元六年勅刺史兼於京官中簡擇歷任有善政者補置其司農太尉府少府等司既掌財物已知次第不在此限

景雲元年十一月諫議大夫寧原悌上疏曰今天下諸州良牧蓋寡何者古難其選今侮其職也然而代所重於京都時見輕於州縣者何也古者牧守政成擢登三事郎官特秀先宰一同誠願尚書曠職則於方伯求才即鄉列闕官必須循材擢用茲令若行仁風扇矣開元八年六月二十八日勅自今已後諸司清望官闕先於牧守內精擇都督刺史等要人兼向京官簡授其臺郎下除改亦於上佐縣令中通取即宜銓擇以副朕

懷

十二年六月二十四日勅自今已後三省侍郎有缺先求曾任刺史者郎官缺先求曾任縣令者

十九年七月十四日勅嶺南及遠府管內諸州并蕃州檢校及攝刺史皆錄奏待勅到然後准式其嶺南遠府蕃州等刺史在任不得輒請宿衛

二十二年八月勅刺史到任不得當年入考縣令闕不得差使

二十五年五月夷州刺史楊濬犯贓詔令決六十配流  
左丞相裴耀卿曰臣以為刺史縣令與諸吏稍別人之  
父母風化所瞻一為本州長官即令終身致敬况本州  
刺史百姓所崇一朝對其吏人皆即加杖恐非敬官長  
勸風俗之意伏望凡刺史縣令本郡決杖特乞停減

二十九年正月十五日令百官於親屬之中舉牧宰乃  
下制曰昔祁奚之舉祁午謝安之舉謝玄寧限嫌疑致  
有拘忌其内外官有親伯叔及兄弟子姪中有材術異

能通嫻政理據資歷可任刺史縣令者各以名聞  
天寶十一載十二月勅牧宰字人所寄尤重至於祿料  
頗亦優豐自合飭躬厲節以肅官吏如聞或犯贓私深  
紊綱紀今後刺史犯贓宜加常式一等十二載九月勅  
簡擇刺史冀令撫字諸使等或奏兼別職掌政理有妨  
既闕親人仍乖本意自今已後更不得別奏請

乾元二年九月勅比來刺史之任皆先奏州縣官屬今  
後除帶使次判官外一切不得奏改官吏到任之後察

有罪累及不稱職者任具狀奏請然令所由與替其刺史非兼節度但有防禦使者副使判官委於本州官中權擇亦不得別奏人並委中書門下著為常式

永泰二年四月勅郎中得任中州刺史員外郎得任下州刺史用崇岳牧之任兼擇臺郎之能

貞元二十年贈故隋州刺史李惠登洪州都督惠登少為平盧軍裨將安祿山反遂從兵馬使董秦涉海戰收滄棟等州史思明反復陷於賊脫身投山南節度來瑱

瑱奏試金吾將軍李希烈反授惠登兵令鎮隋州貞元  
初舉州歸順隨授隋州刺史時遭李希烈殲殘後野曠  
無人惠登朴質不知書率心為政皆與理順二十年間  
田疇加辟人歌謡之時于頃為山南東道節度以其績  
上聞加御史大夫升其州為上及卒故有是贈

元和二年正月制度支如刺史於留州數內妄有減削  
及非理破使委觀察使風聞按舉必當料加量貶以誠  
列城如刺史不奉制勅不得稱有公事請赴本使其錄

事參軍亦不得擅離本州三年正月許新除官及刺史等假內於軍政門外謝訖進辭便赴任其日授官於朝堂禮謝並不須候假開國朝舊制凡命都督刺史皆臨軒冊命特示恩禮近歲雖無冊拜而牧守受命之後便殿召對仍賜衣服蓋以親人之官恩禮不可廢也時新除河南尹裴復求速之任適遇寒食休假李吉甫復求之甥也特為奏請遂兼刺史有是命非舊典也

四年閏三月勅如刺史不承使牒擅於部內科率者先

加懲責仍委御史臺出使郎官御史察訪聞奏

其年十二月嶺南觀察使楊於陵奏貞元中觀察使李復奏南方事宜素異地遠職卑上佐多是雜流太平刺史見闕請於判官中揀擇材吏令知州事臣伏見近日諸道差判官監領州務朝廷以為非宜臣謂南方州縣凋殘刺史闕員動經數歲至僚佐悉是庸人若遣知州必致撓敗伏緣李復所奏降勅年月稍遠懼違朝旨伏乞天恩許臣遵守當道所奏文量才差擇以便荒隅勅

旨依奏

九年十二月袁州刺史李將順坐掊斂擾人貶道州司  
戶叅軍時大潦有詣執政者以為刺史抵禁不經按試  
遽貶官不可乃追詔遣御史馳往推究十二年四月勑  
自今已後刺史如有利病可言皆不限時節任自上表  
聞奏不須申報節度觀察使見任得替後遂於當處置  
百姓莊宅或因替代情弊便破除正額兩稅不出差科  
自今已後此色並勒依元額輸稅

寶歷元年正月七日勅節文刺史縣令若無犯非滿三年不得替如治行尤異但就加賞賚其有才宜他職灼然要藉者中書門下先具事由及授上年月日奏聽進止滿歲遷代無闕者即與進改

其年九月御史臺奏近日新除刺史赴官多違條限請准舊制在途十日如妄稱事故不發奏進止勅旨從之太和三年五月中書門下奏增秩賜金有故事前史所載得者甚希近日方鎮所奏人數漸多自今已後刺史

在任政績尤異檢勘不虛者觀察使具事狀及所差檢勘判官名銜同奏若他時察勘不實本判官量加削奪觀察使奏聽進止所陳善狀並須指實而言如增加戶口須云本若干戶在任增加若干戶如稱墾闢田疇則云本墾田若干頃在任已來加若干頃並須申所司附入簿籍如荒地及復業戶自有年限未合科配者亦聽申奏明言合至其年並收租賦如稱營田課徵所効須云本合得若干萬石在任已來加若干萬石以明覈實

其所加配斛斗便請准數合度支所供本道本軍斛斗  
數如不是供本軍本道斛斗則申所司准管支遣以憑  
考覆不得虛為文飾謬有薦諭勅旨依奏

四年八月御史臺奏謹按大歷十二年五月一日勅刺  
史有故及缺使司不得差攝但令上佐依次知州事其  
上佐等多非其才亦望委外道使臣精加銓擇不勝任  
者具以狀聞昨者宣州觀察使于敷所差周墀知池州  
若據勅旨便合奏剖今勘其由長史司馬並在上都皆

職有錄事叅軍顧監司之任若不重有條約所在終難  
守文伏請自今已後刺史未致上佐闕人及別有勾當  
處許左錄事叅軍知州事如錄事叅軍又闕則任別差  
判官仍具闕人事由分析聞奏并申中書門下御史臺  
所冀詔旨必行繩違有據勅旨依奏其年九月比部奏  
准太和三年十一月十日勅文天下州府迴殘羨餘准  
前後勅文許充諸色公用刺史每被舉按即以公坐論  
贓其應合用羨餘錢物並令明立條件散下州府者謹

具起請條件如後應有城郭及公廨屋宇器械舟車什物等合建立脩理須創置添換者或有公私使客兼遇徵拜朝官送故迎新舊例合有供應宴餞贈贍者或僚屬將校所由等有巡檢非違追捕盜賊須行賞勸合給程糧者或百姓貧窮納稅不逮須有矜放要添填元額者或遇年豐穀熟要收糴貯備以防災敝者右以上並任用當州所有諸色正額數內迴殘羨餘錢物等如不依此色即同贓犯其所費用者錢並須立文案以憑勘

驗勅旨宜仍委御史臺准此勾當五年五月御史臺奏應諸州刺史謝官後限發赴任日准勅例刺史謝官後不計近遠皆限十日內發伏以刺史理人之官分陞下憂寄受命之後固宜速行或以道途稍遙私室貧乏限內不能辦集事須假故淹留虛懸促期多不遵守今請量其遠近次第限日應去京一千里內者限十日二千里內十五日三千里內限二十日三千里以外限二十五日如限內遇延英不開亦請准常例進狀候進止

便發更有妄託事故逗留伏請當時奏聞量加懲責其  
貶授刺史即請准舊例發遣不依此限所冀事得中道  
久而不隨勅旨宜依

七年七月 中書門下奏刺史序遷領憑顯効若非責賞  
無以勸人近者受代歸朝皆望超擢在郡理績無由盡  
知或自陳制置事條固難取信或別求本道薦狀多是  
徇情將明憲章在覈名實伏請自今已後刺史得替代  
待去任之後且復委知州上佐及錄事叅軍各下諸縣

取者老百姓等狀如有興利除害惠及生人廉潔奉公  
肅清風教者各具事實申本道觀察使檢勘得實具以  
事條錄奏不得少為文飾其薦狀仍與觀察使判官連  
署如事不可稱者不在薦限仍望委度支鹽鐵分巡院  
內官同訪察各申報本使錄奏如除授後訪知所舉不  
實觀察判官分巡院官及知州上佐等並停見任一二  
年不得敘用其觀察使奏取止勅旨依奏

開成元年二月中書門下奏應諸州刺史諸府少尹次

赤縣令州府五品已上官并常參官等在任之例約是  
三載命代之後遽即到京人數既多員缺常少稍經時  
月則訴饑寒伏准漢法免罷郡守自非詔徵不得到京  
師建中初勅常參官及外五品已上替後不得擅至京  
師者起今已後請據舊章刺史及五品已上常參官在  
外應受替去任非有徵詔不得到京宜委所在州府取  
其由歷每四月一度附驛申中書門下初狀仍具前任  
政績受代月日申中書門下准前置具員量人才據缺

人才除授其有家在上都因自歸止者正衙見後仍令京兆府依外州府例與申勅旨依奏

其年閏五月中書門下奏伏准舊例刺史授官後皆於限內待延英開日候對奏發日詳度朝旨益重理人之官欲階下觀其去就察其言語亦所以杜塞宰相陳情故除刺史並往往進狀便辭蓋恐對奏之時錯失乖誤自今已後除刺史並望延英對了奏發日地近限促不遇坐日亦望許於臺司通狀待延英開日辭了進發勅

旨依奏

八月中書門下奏致治親人屬在守宰朝廷近日命官  
頗加推擇從今已後望令諸觀察使每歲終具所部刺  
史縣令司牧方策政事工拙上奏其有教化具脩人知  
敬讓賊盜逃去賄賂不行刑獄無偏賦稅平允撫綏孤  
弱不虐幼賤姦吏黠胥侵牟止絕田疇墾闢逃戶歸復  
道途平理郵傳脩節府無留事獄去繫囚糺匿繩違嫉  
惡樹善以公滅私絕去貨殖夙興夜寐宴戲省少人無

謗議家有藏蓋是謂循良之吏愷悌君子其能備此具美者仰以其尤薦聞朝廷特加褒賞增秩改章徵受顯重如或數科之中賴有提舉勤恪不怠處事無闕者仰以次等薦聞量加寵賞偕留未替以候成績其有昧此政經所向無取循資待錄無補於理散材凡器長在人上亦仰以實奏聞當請移於散秩如有加以貪殘黷貨枉法受贓冤訴不伸拷笞無罪有一於此具狀以聞當加以峻刑投諸荒裔賞善懲惡期於必行掾曹邑佐善

惡特異者亦仰聞狀請頒示四方專委廉察仍令兩都  
御史臺併出使郎官御史及巡院法憲官常加採訪具  
以事狀奏申中書門下都比較諸道觀察使承制勤怠  
之狀每歲孟春分析聞奏因議懲獎勅旨依奏

三年三月勅新授刺史如遇入闕中謝者其日各隨本  
班引入候班退刺史便接次對官立候次對官對訖通  
事舍人引至橫階前通事舍人口奏云新授某州刺史  
某人等中謝如喚近前即引上龍墀如不喚即各自奏

發日訖通事舍人即宣某人等可去如去贊拜訖便引出

其年五月中書門下奏舊制刺史已除替人未到依前輩一應務并諸俸料待替到交割便聽東西據山南道所奏刺史得便令牒州停務別差官知州事待到交割方可東西臣以為刺史祿俸固薄留滯可矜又嶺南諸管及福建點府皆是遠僻須有商量並請除到後未交割以前據俸料雜給之中三分支一以資其停費惟戒

黜不在此例制可四年三月中書門下奏嶺南小州多是本道奏散試官及州縣官充司馬知州事不三兩考便請正除僥倖之門莫甚於此須作定制令其得中應奏授上佐知州事起今已後一周年在本任無破缺即任奏請充權知刺史官途之內猶甚徑捷仍須俟一年考不得將兩處相續勅旨依奏

唐會要卷六十八

欽定四庫全書

唐會要卷六十九

宋 王溥 撰

刺史下

會昌元年正月制刺史雖非假日或有賓客須申宴餞者聽之四年八月中書門下奏比緣向外除授刺史多經半年已上方至本任或稱勅牒不到或假故滯留刺史未到前知州官屬惟務因循不急於理百姓受弊罔

不由茲臣等商量今日已後勅到南省限兩日內牒本道便令進奏院遞去到本道復委觀察使勾當去任一千里內限十日進發二千里已上限十五日三千里已上限二十日仍並勒取便進發不得託以事故別取他路經過刺史於先三十箇月為限向後並望以任後計日如有前刺史諸道居住未赴闕廷者各委觀察使每季應管內有無申臺或憂制及疾廢者並須一一具言臺司待諸處報都申中書門下所冀人皆守法朝免遺

才勅旨依奏

六年五月勅諸州刺史委中書門下省選擇非奉公潔  
已素共知者不得妄有除授到官之後理行著稱未三  
周年勿使移改如有才堪拔擢與人地政績須替換  
者不在此限又凡刺史交割之時非因災荒大郡走失  
七百戶以上小郡走失五百戶以上三年不得錄用兼  
不得更與理人官增加一千戶以上者超與遷改仍令  
觀察使審勘諸實聞奏如涉虛妄本判官重加貶責

大中元年正月勅古者郎官出為邑宰公卿外領郡符  
以重理人之官急為政之才也自澆風興扇此道稍削  
頹頑清途便至顯貴理人之術未嘗經心欲使究百姓  
之艱危通天下之利病不可得也朕為政之始思厚時  
風軒墀近臣蓋備顧問如不周知病苦何得應朕訪求  
自今以後諫議大夫給事中中書門下舍人未當曾任  
刺史縣令及在任有敗累者並不在進擬之列

三年二月中書門下奏諸州刺史到郡有條勘須先申

觀察使與本判官商量利害皎然分明即許施行如幸  
是前政利物徇公事不得輒詐移改如不存勾當踵前  
因循判官重加殿責觀察使聽進止仍委出使郎官御  
史常切詢訪舉察勅旨依奏

五年九月中書門下奏諸刺史交割及初到任下擔得  
替後資送下裝事應諸州刺史除替後新人在途者動  
經三四箇月不到任從便送處亦或一兩箇月不到舊  
人在既不理務又須一切州縣祇供將吏依舊衙叅祇

候守分者固難自處多端者猶能害人自今已後望令  
應刺史得替已除官者即勅到後交割了便赴任如未  
除官者勅到後與知州官分明交割倉庫及諸色事並  
分明交割以便令舊刺史離本任行牒所勘問結前刺  
史如大段差謬即委具事狀奏聞其知州官別議推罷  
郡刺史未別除官者准會昌九年勅文已令所司在州  
縣供給伏恐日月久深不遵舊制望令所在經過州縣  
准舊節文處分勿使羈旅州許供三日縣許供二日應

諸州刺史初到任准例皆有一擔什物離任時亦例有  
資送成例已久州司各有定額准乾元元年及至德二  
載并會昌元年制勅比禁科率所由抑配人戶至於用  
州司公解及雜利潤天下州郡皆自有矩制緣未會有  
明勅處分多被無良人吏百姓便致詞告云是贓犯自  
今已後應刺史下擔什物及除替送錢物但不率歛官  
吏不科配百姓一任各守州郡舊亦不得分外別有添  
置若輒率科斂故違勅條當以入己贓犯法餘望准前

後勅處分勅旨宜依仍編入格令永為常式

六年五月中書門下奏嶺南桂管容管黔中安南等道  
刺史自今已後伏請於每年終薦送各官選擇技量資  
序稍議饒本道或知有才能亦許論薦仍須管資相送  
歷任分明更不在奏散試官充司馬權知州事限勅旨  
依奏

其年十二月中書門下應諸州刺史並仰到任後一季  
以來尋訪凋瘵乏由搜求疾苦之本兩季以後可以周

知伏以古之報政備在典章後代因循曾無實效今請  
觀察使刺史到任一年即悉釐具革制置諸色公事逐  
件分析聞奏并申中書門下視其所司真僞自分能可  
辦事有可行者著為令典使久遵守既欲責其潔已須  
令俸祿少充以厚薄不同等級無制致使俸薄者無人  
願去祿厚者終日爭先應申下州司馬與軍事俸料共  
不滿一百千者請添至一百千其上州有不滿一百五  
十千者請添至百五十千其雄望州不滿二百千者請

添二百千其先過者仍舊並於軍事雜錢中方員置本  
收利充給如別帶使額者並依舊不在添限其無明文  
額外徵求或送故迎新廣為率斂或因徵發頓近橫有  
破除皆是貧戶出錢惟使姦人得計其他侵擾色目至  
多不問公私一切禁斷其刺史為政必除其人瘼在官  
勵於公心目限纔終即議遷獎其或不出常流全無政  
績須知事分合守田園不可得替來求官稍遲即興怨  
謗自今已後應詣刺史得替求官者亦准前任年月為

限滿者即量才除授使免饑寒未滿者任其東西使營  
生計其有課績殊異廉使薦論校勘不虛誠可優升者  
不在此限若授任之後聲實相乖即是廉使別帶私情  
或因權勢論說上罔明主下困齊人所罪並歸舉主勅  
旨卿等所條流廉問牧宰等實繫生靈之慘舒化源之  
切務並依所奏

大中九年二月除醴泉縣令李君奭為懷州刺史非常  
例也初上校獵渭上見近縣父老於香林寺設齋為君

興祈福恐秩滿受代上異之踰年宰相以懷州缺刺史  
上聞御筆除之

都督刺史已下雜錄

武德元年六月七日諸州總管加號使持節刺史加號  
持節

顯慶元年九月二十六日制督府及上州各置執刀五十人中州下州各置十人令於衙內祇承都督刺史至貞元元年廢從福建觀察使王雍奏也咸亨五年九月

勅諸州都督刺史及上佐見執魚契者中間遷改須有  
分付其有選改無三官者且留知州事待攝官及三官  
內一人至任依常

垂拱九年七月諸州置子錄事二年正月諸州都督刺  
史宜准京官帶魚袋三年二月上州置市令

先天二年正月勅河北諸州加團兵為本州刺史押當  
其年七月二十四日勅自今已後都督刺史每欲赴任  
皆引面辭朕當與疇咨用觀方略至任之後宜待四考

滿隨事褒貶與之改轉

開元元年十二月三十日勅都督刺史都護每欲赴任皆引面辭訖側門取候進止

八年二月十二日勅都督刺史品卑者借緋魚袋十七年二月勅諸都督刺史上佐等官員缺非安穩者所授官在京一考已上宜謹與改轉

乾元元年六月六日勅令冬入考刺史自今已後並宜停至大歷十四年六月一日勅諸州刺史上佐並許每

年入計至七月四日勅宜起十五年已後已依常式至  
建中元年三月二十五日勅各委本州定上佐入考  
寶應二年七月十一日勅文自今已後改轉刺史三年  
為限縣令四年為限至貞元元年十一月十一日勅文  
自今已後刺史縣令未經三考不得改移至六年十一  
月八日勅文自今已後刺史縣令以四考為滿

永泰二年九月二十二日諸府刺史都護大都督府長  
史有犯者自今已後降魚書停務訖然後推勘聞奏如

未降魚書不在推限至大歷十二年五月十日勅諸州  
刺史替代及別追皆降魚書然後離任無事不得輒追  
赴使及出境刺史有故關使司不得差攝但令上佐知  
州事宰相常充奏也至貞元三年十月勅刺史停務則降魚書  
先是此制自廣德已後多不施行又將節帖權刺史悉  
由其令魚書皆廢至是彰州刺史張遂坐事轉鞠之有  
司請舉舊制也

貞元四年正月一日勅文自今已後刺史不得輒離本

界如是緣司使任以文牒計會應緣州事巨細聽聞奏  
如刺史闕上佐當日聞奏并牒報中書門下省

十四年十一月十二日考功奏所在長吏請立德政碑  
並須去任後申請仍須有灼然事蹟乃許奏成若無故  
在任申請者刺史縣令委本道觀察使勘問

太和二年二月宰臣李絳進則天太后刪定兆人本業  
記三卷宜令諸州刺史寫本散配鄉村

別駕

武德元年六月置別駕貞觀二十三年七月五日改別  
駕為長史上元二年十月十日又置別駕其長史如故  
上州從四品中州五品下州從五品止以諸王子為之  
至永隆元年又廢至永淳元年七月八日復置別駕官  
至景雲元年始用庶姓為之至開元六年二月十二日  
勅舊例別駕皆是諸親比年已來頗多諸色先授者未  
能煩輶已後者自循舊章去冬有因入計不可更令却  
往宜並量材受用至天寶八載八月二十六日勅諸郡

各置三官別駕不煩更置政存省要豈在多員其別駕隨缺便停下州置長史一員上元二年九月二十一日勅文其別駕依却置六年四月勅別駕錄事叅軍有犯贓者禁身推問疾患者准式不稱所職者戶口流散者並委本處聞奏其贓犯者禁身推問疾患者令解所職老耄暗弱才不稱職者量資考改與員外官

大歷十四年六月勅文諸州刺史上佐自今已後准入

計

建中元年正月十九日諸州府品已上正員內上佐宜  
待四考滿停左降官不在限

太和元年正月宰相當處厚奏請復置六雄十望十緊  
三十四州別駕先是貞元中宰相當齊抗奏減冗員罷諸  
州別駕其京百官合入別駕多處之朝列及元和已後  
兩河用兵偏裨立功者率以儲察王官雜補之處厚乃  
復請置別駕以處焉

七年八月九日勅諸王等今後相次出閣且授緊望已

上州刺史上佐

開成三年十二月勅令後諸道節度團練防禦等使不得更奏大將元巡內上佐官

大中四年六月勅光州比是中州停廢司馬員額今以升為上州宜令却置司馬

判司

景雲三年八月二日勅諸州置司田叅軍一員唐隆元年七月十九日廢上元二年九月二十一日又置并置

田正三人

開元十五年四月十三日朔方五城各置田曹叅軍一員階品俸料一事已上同軍家判司專知營田

乾元元年四月十四日勅文錄事叅軍自今已後宜升判司一人

大歷十四年十二月五日諸州府學博士改為文學品秩同叅軍位在叅軍上

縣令

武德元年六月八日大興長安二縣令改為正五品雍州諸縣令為從五品至天寶元年六月九日勅長安萬年縣令授任京判職在養人小有不躬甚妨緝理况道路遙遠往來淹滯遲日百姓披陳未免停止至於疏決固在及時自今已後專令在縣理事每五日聽一入朝開元四年十一月勅撫字之首在於縣令不許出使多不得考每年選補皆不說此官若不優矜何由獎勸其縣令在任戶口增益界內豐稔清勤著稱賦役均平者

先與上考不在當州考額之限

二十八年六月淮南道採訪使李知柔奏縣令考滿准格交付戶口食糧臣近巡按諸州多有考秩向終替人未到請假便去望每至考滿年州司不得給假如有先請假未還考滿者勒到百日內却赴任准格交戶口食糧違者量殿三數選勑旨依奏諸道亦宜准此

二十九年七月勅諸天下諸州縣望鄉上縣不得過二十人中縣不得過十五人下縣不得過十人仍委採訪

使與州縣長官相知選申中書門下

天寶九載三月十二日勅親人之官莫過於縣令比來選司取人必限書判且文學政事本是異科求備一人百中無一況古來良宰豈必文人自今已後郎官御史先於縣令中三考已上有政績者取仍永為恒式

其載十二月勅郡縣官僚共為貨殖近聞有放債侵人互為徵收割剥黎庶自今已後更有此色并遣人影認一匹以上其放債官先解見任物仍納官有利息者准

發處分

上元元年正月勅丞簿等有犯贓私連坐縣令其罪減所犯官一等使遞相管轄不敢為非

乾元元年三月五日勅縣令錄事叅軍自今已後選司所擬宜准故事過中書門下更審詳擇仍永為恒式

廣德二年六月勅諸州府錄事叅軍及縣令其有帶職兼官判試權知檢校等官者自今已後吏部不在用缺之限

永泰元年正月勅諸州府縣今後有才不稱職及犯贓私即任本使及州府奏人請替餘並不任奏請其所許奏人仍須灼然公請曾經驅使考課効資歷當者兼具歷任申授年月并所替官合替事由同奏

建中元年六月門下省奏錄事叅軍縣令三考無上考兩任共經五考以上無三上考及不帶清白陟狀者並請不重注令錄勅旨依奏

貞元二年二月京兆尹鮑防奏狀准廣德二年勅中書

門下及兩省官五品已上尚書省四品已上諸司正員  
三品已上官諸王駙馬等周親已上親及女婿外甥等  
自今已後不得任京兆府判司及畿縣令兩京縣丞簿  
尉等者今咸陽縣令賈全是臣親外甥恐須停罷詔曰  
功勞近臣至親子弟既取繁劇或招過犯寬容則撓法  
恥責則虧恩不令守官誠為至當賈全等十人昨緣畿  
內凋殘親自選擇事非常制不合避嫌

四年正月勅文戶口增加刺史加階縣令減選優與處

分諸色中有清白政術堪任刺史縣令者常叅官各舉所知朕當親自策試其年十月上召京兆府諸縣令對於延英殿以人之疾苦具慰誨之各賜衣一襲

八年八月勅薦官今年新授縣令宜准前後刺例待人計日四考後赴上

元和六年正月勅江淮大縣每歲據闕委三省御史臺諸司長官節度觀察使各舉堪任縣令不限選數並許赴集臺司省官及刺史赤縣令有闕先於縣令中採擇

有能否與元舉人賞罰三年三月吏部奏應授三千里外縣替年終缺人等准元和二年五月十九日收量抽三千里外縣令至元和三年終計日成四考闕其新授三千里外縣令等合用待舊人成四考後至十二月二十五日赴請准元和三年三月二十四日勅其新授三千里外官人請從申下後不許程限但至十二月內赴上加出十二月內即連程例處分如授替人續有故事便請放授官人上止不必待至十二月仍請自今已後

每年若有替年終缺人亦請准此勅旨依奏

五年四月勅元和三年勅書所舉縣令皆直言其事不得妄有文飾須吏部舉其事狀隨事檢勘者令主兵略勘資歷記未究人材自今已後宜委吏部精加考覈必使詳實不同旱選人例酬官仍令四時注授其觀察使刺史所舉人不得授以本州府縣令到任後有犯罪其所舉主准前勅貶罪

四年正月中書門下奏狀准元和六年制書舉薦縣令

等前後勅文非一有司難於遵守今請中外所舉縣令並隨表狀十月三日到省省司精加磨勘依選人例分入三銓注擬平選人中有資序事跡人才與前舉縣令相類即先注其四時集望停從之令長人之吏也比以資授多不稱官故令庶僚薦舉所知以廣得人之路及舉薦上才或不省就薦者多不出其類徒以未涉資序超踐優秩論者以為啟俾門故稍

復舊制焉

六年十月中書門下奏准建中元年勅每年授官人令舉自代狀者又臣聞周之羣寮委於冢宰漢之多士辟

於有司故凡稱大僚皆得盡善陛下念黎元之困設令  
長之科羣僚舉知天下蒙福惟善薦延相繼敦勸大行  
苟或容私則利害攸伏請所舉縣令到任刑罰寃濫及  
有贓犯者其舉薦官削階及停見任書下考並准元和  
三年勅處分委御史臺諸道觀察使嚴加察訪不得容  
貸其諸道所奉官屬及有狀諭薦人如有贓犯過惡亦  
請具名聞奏量加殿罰所冀人知所懼不敢妄行為官  
擇人得賢報國從之

七年四月勅諸道州府有田戶無桑處每約一畝種桑  
兩根勒縣令專勾當每年終委所在長史檢察量其功  
課具殿最聞奏

十一年九月中書門下奉每舉薦縣令字人之官從官  
所重遂論許薦冀得循良自今已後舉人事跡與節文  
同及檢勘無憑據并到任後勅文雖條約比來銓不稱  
職及有負犯事並請量輕重坐其舉主如輕則削奪重  
則貶責伏以前授勅文雖有條約比來銓覆多務因循

今重申明所貴畫一其所舉人到省後所司檢勘如節文不同仰具事由并舉人名御申中書門下如有司鹵莽使與判丞察知事狀有所違越則所司亦與舉主同坐從之長慶元年五月勅自今已後舉縣令宜停

會昌元年三月制節文如聞比者縱情杯酒之間施刑喜怒之際致使薄書停廢刑獄滯寬其餘縣令每月非假日不得輒會賓客游宴六月五日勅縣令員數至廣朝廷難悉知諸吏部注擬只繫資考訪聞近日多不得

人委觀察使刺史於前資官及承前攝官曾有課績人  
中精加選擇具名聞奏中書門下勘資歷記除本道縣  
令如後犯贓違法即連坐所舉人及判官重加懲貶其  
月勅自今已後縣令非因災旱交割之時失走二百戶  
以上者殿一選三百戶已上者書下考殿兩選如增加  
二百戶以上者減一選五百戶以上者書上考減兩選  
已減者優與進改

大中元年正月勅守宰親人職當撫字三載考職著在

格言上元之中頻詔令縣令五考方得改移近者因循  
都不遵守諸州縣令得三考兩府畿亦罕及二年以此  
字人望其成化簿書案牘寧免姦欺道路有迎送之勞  
鄉里無蘇息之望自今已後刺史縣令除授後一例滿  
三十六箇月方得更換其責授遷擢即不在此限其替  
後量其課績作等聞奏其在第一等中書門下及吏部  
優與處分第二等依資改轉第三等量加降黜其授替  
後委刺史錄事叅軍比量等第申觀察使便與本判官

勘覆請資申奏以後因事考覆有不如所奏觀察判官錄事叅軍據人數節級懲罰觀察使奏取進止

二年二月刑部起清節文起今後縣令有贓犯錄事叅軍不舉者請減縣令二等給罪其錄事叅軍有罪刺史不舉刺史有罪觀察使不舉者並所司奏聽勅旨

三年九月中書門下奏兩府畿令及次赤令伏以古者為吏長子孫蓋言其在官已久也然後備諳風俗政術可施近日入任門多替稍速近以降手勅續又面奏德

音應選擇者不得其人欲居撫字者久安其任臣等商量自今已後其兩府判司及縣丞尉不帶勅額事及不知捕賊不得非時奏請如或政績尤異與朝廷別有獎拔及職事不修須議替者不在此限內勅旨依奏

其月勅諸道所舉縣令宜直言事跡不得妄飾虛詞委吏部精加覈實當有懲殿兩畿令未成三考不在替限四年正月勅節文應天下縣令有利於人而可舉行者有害於物而可革去者並委所在縣令別於刺史刺

史具列上聞委中書門下據事下刺史下觀察使詳酌  
聞奏當與改更或在官因循不舉必當重責罰更不得  
授縣令

丞簿尉

武德七年正月勅每州置大中正一人掌知州內人物  
以本州人聞望者兼領無品秩至貞觀初廢其年三月  
二十九日改縣正為縣尉

開元十六年五月二十五日勅州府及縣倉督府司佐

史縣錄事里正等若有理行明嫻案牘任經十年不在解限

寶應元年五月十九日制州縣官自今已後三考一替其考滿皆令待替人不到宜校四考校停至六月九日勅准式凡經四考加年勞一階今既三考即替其階特許結敘

其年十二月勅吏部侍郎張孚奏今年五月十九日制州縣官自今已後宜令三考一替者今數州申解疑三

考後為待替到為便勒停今望令校三考官待替到替人不到請待校四考後停至貞元六年十二月二日勅刺史縣令以四考為限赤令既是常參官不在四考限次赤令既同京官宜以三考為限至九年七月十九日諸州縣令既以四考為限如無替者宜至五考後停貞元二年五月十九日勅州縣劇務不可缺人自今已後諸司諸使不得差兩府判司畿赤官出界勾當事如有藉其才能奏請改官任使者不在此限

大中三年九月勅兩判司縣丞簿尉不帶勅額職事者及不知捕賊不得非時奏請如是故非常須行獎黜者不在此限

州府及縣加減員

天寶五載九月勅減劍南瓊山郡叅軍兩員縣丞三員  
主簿三員

八載昭應縣更加簿尉各一員

寶應元年十月四日鳳翔府叅軍六員請減兩員縣丞

兩員減一員主簿兩員減一員簿尉六員天興縣准此  
大歷二年八月十三日隴鳳兩州除刺史外請各置別  
駕一員錄事叅軍一員司功司戶各一員每縣令尉各

一員本道奏

四年三月四日長安萬年縣丞各減一員主簿一員尉  
兩員昭應縣丞簿一員尉兩員好畤同官奏原各減丞  
尉一員至五年五月十四日省京兆田功兵士曹各一  
員叅軍兩員至十四年三月五日並復置

十一年六月十三日鳳翔府加會曹叅軍一員普閏縣

請加尉一員

本府奏

其年七月二十九日商州停司田叅軍上洛商洛兩縣  
令外留主簿及尉一員其丞簿請停

洛南等三縣唯留縣令及主簿餘並停

本州奏

建中二年四月幽州管內每縣置尉兩員餘並停

本道奏

貞元元年九月御史大夫崔縱奏內外官員臣伏以兵  
戎未息仕進頗多在官者既合序遷有功者必須褒賞

比來每至選集不免據闕留人嘗歎遺才仍招怨望况  
緣頻有恩詔甄錄功勞諸道敘優人數甚廣見須處置  
不可稽留若令停減吏員實恐未便於事非但承優者  
無官可授抑又序進者無路可容本冀便人翻成歎怨  
恐須仍舊以適其宜更待事平復議經制勅旨依奏

二年九月二十五日許州停減正員官五十四員本道奏

十二月十九日申光管內停正員六十一員本道奏

三年正月十七日勅東都畿內唐汝鄧三州停減官員

准許蔡等州例

其年五月宰相張延賞奏曰為政之本必先命官舊制  
官員繁而且費州縣殘破職此之由也臣在荆南所管  
州縣闕官員者少不下十數年吏部未嘗補授但令一官假  
攝公事亦理以此言之官員可減無可疑也請減官員  
收其祿俸以資幕士從之

閏五月八日勅諸上等州刺史上佐一員錄事叅軍司  
戶司兵司士各一員中州刺史上佐一員錄事叅軍司

戶司兵各一員下州刺史上佐各一員錄事叅軍司戶  
各一員諸州叅軍一半諸縣中等已上令一員尉一員  
下縣令一員京兆河南府司錄判司及四赤縣丞縣尉  
量留一半叅軍全留餘並停省其諸赤及畿縣每縣留  
令一員丞一員簿一員尉一員餘府准上等州縣例以  
諸州戶口減耗三分去二其官員合省今員缺偏併尚  
未均平宜令所司依前件額即分析州縣等第與奏其  
在降官且仍舊其餘一切權停至來年五月三十日續

取分其應停減官俸糧祿職田雜料手力糧課等一切  
已上各宜令度支勘審檢收納送 上都左藏庫收貯充  
賞戰士所用至七月其先減官員宜仍舊

五年六月二十日興元府少尹司錄戶法二曹各兩員  
功倉田兵士曹文學各一員叅軍錄事各四員南鄭令  
丞主簿兩員尉三員固城襄城縣令丞簿各一員尉各  
三員金牛三泉縣令丞簿各兩員

八年四月容管經略使奏當管今請除刺史留官一百

七十三員餘並請停減其課料請迴充將士資賜從之  
其年十二月汝州奏七縣更量復尉一員依奏

十四年八月魏博節度使却置管內州縣官都八十一

員倉曹參軍戶曹參軍兵曹參軍法曹參軍 已上請

依前置雙曹田曹參軍文學市令

闕

已上請

依前置

闕

元城縣貴鄉

縣

闕

已上請依前置更縣尉一員相州

貝州博州澶州衛州司法參軍司士參軍司田參軍文

學市令

闕

已上請依前置 魏州昌樂縣魏縣冠

氏縣館陶縣朝城縣草縣相州安陽縣鄴縣內黃縣臨

河縣湯陰縣堯城縣洹水縣臨漳縣城安縣臨慮縣具

州宗城縣臨清縣清河縣永濟縣歷亭縣徑城縣武縣

夏津縣漳南縣州城縣堂邑縣清平縣博平縣武水縣

高唐縣漕州頓丘縣黃縣觀城縣清豐縣

已上四

十一縣請依前置尉丞勅旨依奏

十七年三月勅天下州府別駕及司田田曹參軍除京

兆河南太原三府外其諸州府判司雙曹者各省其一  
錄事叅軍准判司例

元和六年六月宰臣李吉甫奏請減職員量定中外俸  
糧伏以唐虞建官不過數十夏商官倍方及三百周禮  
漢志兼具胥吏其職員稍廣然約後漢命官數亦不過  
七八千員自漢至隋十有三代攝其官員皆少於國家  
所置事具史籍不敢備陳伏惟睿聖文武皇帝陛下稟  
上聖之姿啟中興之運光宅萬方富有天下及茲七年

垂日月之明以搜俊乂崇勲華之俗以厚生靈然而人  
未富者蓋由流品尚雜職員尚多存無事之官食至重  
之稅生人轉困冗食益繁臣等日夜計此非不至熟臣  
按晉時荀勗上疏稱省吏不如省官省官不如省事漢  
光武并合吏員州郡縣邑纔十分置一此省官也魏大  
和中曾遣王人四出減吏員之半此省吏也晉武從之  
於是減州郡一半人吏以赴農務及周太祖於隴坻東  
敗齊用蘇綽為相釐改憲度議曰善官人者必先省其

官蓋官省則事省事省則人清官煩則事煩事煩則人濁清濁之由在於官之煩省由是兼假之員悉皆罷黜國家自天寶以後中原宿兵見在軍士可計者已八十餘萬其餘去為商販度為僧道雜入色役不歸農桑者又十有五六是天下以三分勞筋苦骨之人奉七分待衣坐食之輩臣每念至此何嘗不中夜輟寢對案忘食幸遇陛下膺期撫運惟新盛業澄源正本孰急於斯臣竊計當今內外官見以兩稅錢給俸料者不下一萬

員其間有職出異名事離本局府寺曠廢替組因循  
者甚衆况歛賦日寡而授祿者漸多設官有限而入色  
者無數九流安得不雜萬務安得不煩况漢初置郡不  
過六十文景醜化百王莫先郡少則必不政紊郡多則  
必不事理分明之驗也今天下三百郡一千四百餘縣  
故有一邑之地虛設羣司一鄉之毗徒分縣職所費至  
廣所制全輕凡此之流並須釐革伏請勅吏部侍郎一  
人郎中一人兵部侍郎一人給事中中書舍人各一人

錯綜利病詳定廢置其吏員可併省者併省之州縣可併合者併合之每年入仕之徒可停減者停減之此則利廣而易求官省而易理稍減冗食足寬疲疎從之遂命給事中段平仲中書舍人韋貫之兵部侍郎許孟容戶部侍郎李絳同詳定減省州縣等事其年九月吏部奏准勅併省內外職員諸州府共八百八員其中下判文學中下縣丞市令一例停減餘官並量減諸王府除五品已上官外錄事參軍一員功曹參軍二員餘並請減至十三

年正月省蔡州汝南尉

十四年三月吏部奏請用鄆曹濮等一十三州縣官員  
其十二州諸各置錄事及司局法等叅軍各一員縣置  
令簿尉各一員待給復滿日依舊從之五年正月鎮州  
觀察使王承宗奏鎮冀深隨等四州請每州置錄事叅  
軍一員判司三員每縣置令錄一員主簿一員尉一員  
又從之

太和二年十月西州觀察使奏加減管內州官員彭州

濛陽縣眉州彭山縣邛州安仁縣尉各兩員令請減一員漢州雒縣什邡縣尉各一員令請更加一員綿竹縣元無縣尉今請置尉一員眉州文學參軍共三員令請減參軍一員邛州文學參軍二員令請減一員漢州並無文學參軍今請各置一員其料課職田祿米等伏望各依元額支給從之

九年九月淄青觀察使王彥威奏請停管內縣丞二十  
九員人從之

會昌四年五月中書門下奏應諸州縣佐官近令約戶  
稅多少量佐官實欲漸去冗員以憲戶素令諸道所奏  
戶滿五千稅滿一萬不合停減者其類已多又假以當  
路為詞猶務占惜臣等商量當路頓亦不常有若遇大  
軍頓即權勾當餘所存例多如此望令吏部郎中柳仲  
郢據元勅額類會停減不得許其破除勅旨依奏

其年六月吏部奏准會昌三年十一月十三日及今年  
五月十日勅類會停減諸州府縣佐官冗員今以州府

申闕解內戶稅多少及州府官員閒劇類會合減官員一千二百一十四員勅旨依奏

大和元年五月邠寧觀察使張寧緒奏當道新平三水永壽宜祿等四縣請各置主簿一員

會昌四年六月十九日准勅以稅額數少悉減佐官令伏請依前每縣各置主簿一員勅旨依奏諸處有佐官處並不得授引此例其年七月滄濟德等州觀察使奏當道於諸舊減員縣各置縣尉一員從之十二月吏部

奏諸州縣官准會昌四年六月十九日勅停減共一千二百二十四員伏奏今年十一月二十二日勅宜令吏部揀擇縣邑有人戶五千稅錢一萬貫以上與一員官仍天下州縣所添不得過四百員者准勅條流諸添置外兼於州官內據稅錢額定等第及觀察使節度州量各添置共三百八十三員

天祐元年五月勅河南府畿縣先減尉一員可依京兆府例復置縣尉一員

唐會要卷六十九